



Nuuk, 27. januar 2014
Imm.ataatsimiinneq, Imm./Pkt. 9

Inatsisartut Suleriaasianni § 52 malillugu oqaluuserisassani tullermut ikaarsaarnissamut siunnersuut.

Naalakkersuisut siulittaasuat annertuumik akisussaaffeqarpoq. Ingerlatsinermit akisussaaffik qaffasinnerpaaq Naalakkersuisut siulittaasuanniippoq. Naalakkersuisut siulittaasuat pisussaaffeqarpoq partiini kisiat imaluunniit Naalakkersuisut kisiisa pinnagit, kisianni nunatsinni innutaasugut tamatta pilluta sulissalluni. Akisussaaffillu tamanna naapertorlugu aaqqiissuteqartariaqarluni.

Innuttaasut tusaaneqartariaqarput, illuatungiliuttut aamma tusaaneqartariaqarput.

Naalakkersuinikkut aqutsinermi naalakkersuilluarneq pissuserissaarnermik tunnga-veqarpoq innuttaasullu qinigaasunik asissuilinginnissaanik aamma imaqarluni, naalakkersuinikkullu suliaqarnermi malittarisassanut inatsisinullu atuuttunut ataqqinninnermik aallaaveqartariaqarluni.

Kingullermik Inatsisartunut qinersigattali ukioq ataaseq suli qaangiuteqqajangilaq. Maanamulli ajuusaarnaraluartumik Inuit Ataqatigiit, Nunatsinni innuttaaqaterpassuatta minnerunngitsumillu inuiannit nunatta avataaneersunit arajutsisimaneqarunaareerpoq qanoq Naalakkersuisooqatigiit arlaleriaqalutik naalakkersuinikkut aqutsinermi naalakkersuilluarneq aqutsisariaqarnerlu nalorsarfigitigineraat aammalu sinaakkutinut najoqqutassaritinneqartunut paasinnissimanagerat qanoq amigarlunnartigisoq.

Pissutsit taamaaliartornerat inuiaqatigiinnut kalaallinut iluaqutaanngilluinnarput, taamaalisoqarneralu akissaqartinngilarput!

Taamaattumik Inuit Ataqatigiit Inatsisartuni ilaasortaataitaasa, siuliini ilaasortaqa-titsinnit allanit aamma oqaatigineqareersut tunuliaqutaralugit inassutigaarput ullormut oqaluuserisassap tullianut ingerlaqqissasugut, Naalakkersuisut siulittaasuata Nunanut allanut aamma Naalakkersuisuusup politik-ikkut aqutsiniarneranut tatiginnikkunnaarnerput pissutigalugu.